

## **Novemberimi Taserallimmit nutaarsiasat**

Oktoberi pisimasoqarfioqisoq Taserallimmi naalluataavippaput. *Asanninnilersaarut erinarsornertalik **Gi mi tiggum**, Silamiunit* isiginnaagassiaq takutikkatsigu 31. oktober, Taserallimmi. Ulloq taannartaaq nipilersoqatigiit **Angu** aamma **Alter Me** illorsuarmi timersortarfimmi tusarnaartitsippat nuannarineqaqalutik.

### Novemberimi pisussarpasuit

**Anda Uldum & Jan Hilmar, tusarnaartitsinerit** Marlunngorneq aamma pingasunngorneq novemberip ulluisa 4-ni aamma 5-iani meeqqanut tusarnaartitsinerup ullorissavai. Taakku matoq-qasumik aqqissuussaapput meeraannarnik peqataaffigineqartussat. Sisimiut kommuniata aamma Atlantic Music-ip taakku aqqissuussaraat.

### **Qasigiannguarmiut Sisimiunut**

Isiginnaartitsisartoqatigiit Qasigiannguarmiut Josef Løvstrømimmit siulersorneqartut Taserallimmi aliikkusersuissapput 8. aamma 9. november. Isiginnaartitsissutit ilaat pingasut ukuussapput: *Sooq naasortalissavinga takusinnaanngisannik, Meerartaaqqaanni-unneq* kiisalu *Assiliivik nutaaliaq atorlugu ersersaaneq.*

Peqataasussat tassaapput: Andrea Rosback, Pilu Thorin, Makkannuaq Johansen, Parnuuna Brandt, Irena S. Thorning, Margrethe Sandgreen, Julie Løvstrøm, Augusta Hansen, Abel Smith, Josef Løvstrømilu. Isiginnaartitsinerillu akornisigut Magdaline aamma Arne Heilmann nipilersortassapput. Suliniut taanna Tips & Lotto-mit tapiiffigineqarluni ingerlanneqarpoq. Aliikkusersuinerit pissapput 8. november nal. 19.30, aamma 9. november nal. 16.00. Iserneq meeqqanut 40,- kr. 60,- kr-inilu inersimasunut.

Nuannissaqaaq, aliikkusiarluarisi.

### **Saqqummersitsineq: Jonas Molbæk**

Eqqumiitsuliortoq, qalipaasoq Jonas Molbæk, Sisimiuni najugaqartoq Taserallimmi saqqummersitsissaaq 14. novemberimiit.

Jonas Molbæk ilinniartitsisuuvoq, qalipaaneermik imminut ilinniartissimasoq, arlalippassuariarlunilu Danmarkimi saqqummersitsisareersimavoq aamma illunik kusassaanernik suliaqartarsimalluni.

Qalipaaneerup eqqumiitsuinik misileraasuvoq, stencils aamma blindkontur atorlugu galeriiaarilluni qalipaatinik akoorisarpoq titarnerillu ilisarnaatigai. Qalipakkamigit nunarsuatsinni pisunik eqqumiitsunik, ingasattajaartunik kusanartunullu oqaaseqaatitut ippat, nunarsuatta eqikkaluttuinnarnerata pilluaqqussutaanut perloqqussutaanullu, kulturikkullu akulerulluta aakkaluttuinnar-nitsinnut. Nunarsuatsinni avatagiisitsinnut inuunermullu qinnagassarinnissutaapput. Jonas Molbæk, eqqumiitsulioqatigiinni Art Money-mi peqataasoq, sapaammi 16. november ualikkut nal. 16.00 qalipakkani oqaluttuarissavai.

### **Sisimiuni ullut kulturisiorfiit**

Ingerlanneqassapput 15. aamma 16. november Taserallimmi. Aqqissuisoralugit Sisimiut Kommunia, Taseralik aamma peqatigiiffiit kulturimik ingerlataqartut, aningaasaliisuuppullu Namminersornerullutik Oqartussat. Ulluni marlunni pisussarpasuit immikkut tusagassiutinut nalunaarutigereerpavut, nittartakkatsinnilu takuneqarsinnaapput. Ulluni Taakkunani Taseralik tamarmi ataatsikkut atorneqassaaq. Immikkut meeqqanut aqqissuuisoqarluni, ilaquta-riinnut inersimasunullu, kiisalu utoqqaat innarluutillillu puigorneqassanngillat. Iserneq akeqassanngilaq, inissarli killeqartarmat bilitsinik Taserallimmut aallersoqarsinnaassaaq, program saqqummeriarpat.

### **Michala Petri aamma Lars Hannibal**

Blokløjtje aamma spansk guitar atorlugit erinniarsuarnik nipilersortartutut nunarsuatsinni tusaamaneqarluartut Michala Petri aamma Lars Hannibal Taserallimmi tusarnaartitsissapput novemberip ulluisa 20-anni, unnukkut nalunaaqutaq 20.00. Iserneq 60,-

kroniinnaqarpoq. Eqqaamallugu tusarnaartitsineq inersimasunuinnaammat, meeraaqqanik peqateqarnissaq pinaveersaarta-riaqarluni. Petri Hannibalilu pillugit ima oqartoqarsinnaavoq: Erinnat nipilersukkatik atorlugit nipilersortartut taakku marluk inerilluinnarsimapput teknikkikkullu pikkorilluinnassuseq angusimallugu, qularnaatsumik tusarnaartumut misigisaq pikkunarnerulersillugu. Tusarnaartitik tiguartarpaat misigitillugit tusarnaartitsinerup imaannaangissusaanik immikkuullarissusaanillu, noqartit uummammiittut tamaasa attorlugit. Nipilersornermut nipilersuutinullu ataqqinninertik atorlugu, Michala Petrip aamma Lars Hannibal-ip tusarnaartitik qasuernartumik tunisarpaat, nipilersornerup anersaavata iternganit pisumit.

Petri Hannibal-ilu pillugit annertunerusumik paasisaqarsinnaavutit nittartakkatsinni [www.taseralik.gl](http://www.taseralik.gl) –imi. Iserneq 60,- kr.

### **Inuusanik isiginnaartitsineq**

“Niviarsiaqqap aallarnera”, taama ateqarpoq 26. november meeqqanut minnernut isiginnaartitsissutissaq isiginnaartitsisartoqatigiit Teatret Lampe-p takutitassaa.

“Niviarsiaqqap aallarnera” oqaluttualiaavoq nutaaliaq ilaqutariinnut meerartalinnut tulluuttoq. Oqaluttuarineqarpoq niviarsiaaraq taallioortoorusuttoq, taamaattumillu ilaquuttani angerlarsimaffinilu qimallugit aallartariaqartoq. Ingerlaarnermini naapittarpai inuit eqqumiit-sorpassuit tarnigillu anersaakkut pusuunngortitsisartut. Silarsuaq oqaatsinik pinnguarnermik angakkuarnermik taalliornermillu ulikkaartoq aqutissaavoq, immaqalu imminut nassaari-niarnermi tassa aqutissaq.

Nikoline Werdelin isiginnaagassiortuuvoq, isiginnaartitsinerlu inuusanik alutornartunik isiginnaartitsisunik erinnanillu nuannersunitaaq ulikkaarpoq.

Isiginnaagassiaq ilaqutariinnut 6-nit 11-nut ukiulinnut tulluursagaavoq.

Iserneq meeqqanut 20,- kr. inersimasunut 40,-kr. Teatret Lampe Katuarlu peqatigalugit aaqjissuussaavoq.

### **Juulleriaruaaq Café Taseralimmi**

Novemberi imaasereermat juulli qanilliaruaaq. Café Taseraliup oktoberimi iluatsilluartumik ingerlatani tallimannngornikkut frokostbuffet naammatsivilluni neriffigineqarsinnaasoq novemberimissaaq ingerlatsissavaa, kr. 65,- 11.30-13.30-imut. Kiisalu maana neqeroorutaa-voq 28. november, unnukkut *julefrokostertitsinissaq*. Nerisassat mamartut, nipilersukkallu nuannersut ilimagineqarsinnaaput. Ikinngutigiit suleqatigiilluunniit inissamik inniminniilereersinnaaput. Unnuk taanna Ivinnguaq Band nipilersussapput, peqataassalluni Henrik Dahl. Peqataaneq 225,- kr-niinnaqarpoq.

### **Filmigassat**

Novemberimi filmigassanik neqeroorutissaqaqagut. Silap qinnagasaarinera pequtaalluni **Hellboy 2: The Golden Army** angumeqqutinngitsoorpoq. Taamaattumik takutissavarput **4., 5., 6. november** unnukkut **21.00**.

Ulluni taakkunanissaq **The Love Guru** takutissalugutigu nal. **19.00**.

Weekendi aliikkusersuinernut allanut atorsinnarlutigu 11., 12., 13. november takutissavarput **Max Payne**, nal. **19.00**

Taseralimmi filmigassat allat [www.taseralik](http://www.taseralik), imaluunniit Sivdleq-mi sapaatit akunnikkaartumik malinnaaffigisinnavaatit.

Nuannisarluarnissassinnik kissaallusi  
*Juaaka Lyberth*  
*Taseraliup pisortaa.*